



«Քայլ առ քայլ» բարեգործական հիմնադրամ

«Նախադպրոցական հաստատության մանկավարժական աշխատողների մասնագիտական կարողությունների և հմտությունների զարգացման» ծրագիր

## ՀԵՏԱԶՈՏԱԿԱՆ ԱՇԽԱՏԱՆՔ

Թեմա՝ Նախադպրոցականի կարողունակությունների ձևավորման հիմնահարցը

Դաստիարակ՝ Կարինե Ղահրամանյան

Մանկապարտեզ՝ «Գրիբոյեդովի մանկապարտեզ» ՀՈԱԿ

2023թ.

## ԲՈՎԱՆԴԱԿՈՒԹՅՈՒՆ

ՆԵՐԱԾՈՒԹՅՈՒՆ.....	3
1. ՆԱԽԱԴՊՐՈՑԱԿԱՆ ԿՐԹՈՒԹՅԱՆ ՊԵՏԱԿԱՆ ՉԱՓՈՐՈՇՉԻ ՀԻՄՆԱԿԱՆ ԴՐՈՒՅԹՆԵՐԸ.....	6
2. ՆԱԽԱԴՊՐՈՑԱԿԱՆ ՏԱՐԻՔԻ ԵՐԵԽԱՆԵՐԻ ԱԿՆԿԱԼՎՈՂ ԿԱՐՈՂՈՒՆԱԿՈՒԹՅՈՒՆՆԵՐԸ.....	9
Հետազոտության ընթացքը.....	14
ԵԶՐԱԿԱՑՈՒԹՅՈՒՆ.....	30
ՕԳՏԱԳՈՐԾՎԱԾ ԳՐԱԿԱՆՈՒԹՅՈՒՆ.....	31

## ՆԵՐԱԾՈՒԹՅՈՒՆ

Ի՞նչ է կարողունակությունը: Կարողունակությունը անհատի համալիր բնութագրիչ է. այն գիտելիքների, հմտությունների, վերաբերմունքի և արժեքների համակարգ է, որը թույլ է տալիս այս կամ այն ոլորտում հաջողությամբ լուծել որոշակի խնդիրներ: Համաձայն այս սահմանման՝ եթե որևէ մեկը հավակնում է կարողունակ լինել որևէ բնագավառում, ապա նա պետք է տիրապետի այդ բնագավառին բնորոշ որոշակի գիտելիքների, հմուտ լինի այդ բնագավառում որոշակի գործունեություն ծավալելու, պետք է ունենա արժեքային որոշակի համակարգ և կարողանա իր դիրքորոշումն արտահայտել այդ բնագավառի որոշակի հարցադրումների, երևույթների վերաբերյալ: Կարողունակությունը չի կարելի համարել վերջնականորեն ձևավորված որևէ արդյունք: Վերջինիս ձևավորումն անընդհատ գործընթաց է, որի ժամանակ այն անընդհատ կարող են կատարելագործվել: Կարողունակությունների ձևավորումը սկսվում է վաղ մանկությունից և շարունակվում է ամբողջ կյանքի ընթացքում:

«Կարողունակություն» եզրույթը մանկավարժական գրականության մեջ սկսել է շրջանառվել անցած դարի 70-80-ական թվականներից, երբ արևմտյան երկրներում և ԱՄՆ-ում սկսեցին լրջորեն քննադատել կրթության նպատակներն ու բովանդակության ձևավորման մոտեցումները: Արագ փոփոխվող կյանքը, գիտության և տեխնիկայի շարունակական աճը մասնագետներից պահանջում էին աշխատանքային շուկային արագ հարմարվելու ճկունություն: Ամերիկյան հետազոտողները պարզեցին, որ շատ հաճախ մարդկանց ինտելեկտի բարձր աստիճանը մասնագիտական գործունեության ժամանակ մնում է չիրացված: Այդ ժամանակներում լայն տարածված IQ թեստերը, որոնցով չափում էին մարդու իմացական մակարդակը, չէին երաշխավորում նրա մասնագիտական հաջող գործունեությունը: Թեստը տալիս էր բարձր արդյունք, մինչդեռ իրական կյանքում մարդը ցածր արդյունավետությամբ էր աշխատում:

Ամերիկացի հետազոտողները կատարեցին բարձր արդյունավետության հասած մարդկանց վարքի, գործունեության ուսումնասիրություններ և արդյունքում ձևակերպեցին նրանց ընդհանրությունները միավորող որակների համալիր խումբ, որն անվանեցին կոմպետենցիա:

Այդ ժամանակ արդեն պարզ դարձավ, որ միայն նեղ առարկայական դաշտում գիտելիքների հաղորդումը և հմտությունների ձևավորումը բավարար չէ, այլ անհրաժեշտ է հանրակրթության նպատակների առավել լայն գիտակցում: Հանրակրթական համակարգին նոր պահանջներ սկսեցին թելադրվել գործարար շրջանակներից: Դրա պահանջն առաջացավ հատկապես աշխատանքային շուկայի կառուցվածքի փոփոխությամբ: Պարզ դարձավ, որ հանրակրթությունը պետք է ձևավորի այնպիսի կարողունակություններ, որոնք անհրաժեշտ են յուրաքանչյուր անհատի՝ արագ փոփոխվող հասարակությունում հաջողությամբ կազմակերպելու իր առօրյա կյանքն ու գործունեությունը: 1990-ականների վերջին և 2000-ականների սկզբին առանցքային կարողունակությունների ձևավորմանը նպատակաուղղված կրթական ծրագրեր սկսեցին կառուցել արագ զարգացող նորարարական տնտեսություններ ունեցող այնպիսի երկրներ, ինչպիսիք են Ֆինլանդիան, Ավստրալիան, ԱՄՆ-ի առանձին նահանգներ, Կանադան, Հարավային Կորեան, Շոտլանդիան, Իռլանդիան, Սինգապուրը: Ավելի ուշ այդ շարժմանը միացան Չինաստանը, Ճապոնիան, Գերմանիան, Հոլանդիան, Լատինական Ամերիկայի և հետխորհրդային երկրները: Հետևելով զարգացման ընդհանուր միտումներին՝ յուրաքանչյուր երկիր, ելնելով իր մշակութային, պատմական, սոցիալ-ժողովրդագրական, տնտեսական առանձնահատկություններից, այդ ուղղությամբ շարժվում է իր նախընտրած ճանապարհով:

Չնայած այս հարցում միասնական մոտեցումը բացակայում է, սակայն մի բան հստակ է՝ առանձին առարկաների բովանդակության վրա կառուցված կրթական մոդելն իր դիրքերն արագորեն զիջում է առանցքային կարողունակությունների վրա հիմնված կրթական մոդելին:

Բոլորի համար պարտադիր պահանջների շարքում նեղ առարկայական գիտելիքներից և գործնականում դրանք կիրառելու կարողություններից բացի, որոշիչ դեր են սկսում խաղալ համապիտանի կարողունակությունները, որոնք աստիճանաբար դառնում են համընդհանուր գրագիտության պարտադիր բաղադրատարրեր:

Կարողունակությունները նախադպրոցական տարիքի երեխաների կողմից ուսումնառության և դաստիարակության գործընթացում ձեռք բերված գիտելիքի, հմտությունների, արժեքների և դիրքորոշումների հիման վրա ըստ իրավիճակի արդյունավետ ու պատշաճ արձագանքելու ձևեր են:

2021 թվականի մայիսի 13-ին Հայաստանի Հանրապետության կառավարությունը հաստատել է նախադպրոցական կրթության պետական կրթական չափորոշիչը: Չափորոշիչի հիմքում նախադպրոցական տարիքի երեխաների կարողունակությունների վրա հիմնված մոտեցումն է:

Սույն աշխատանքի արդիականությունը պայմանավորված է նախադպրոցական կրթության պետական չափորոշիչի ներդրման հետևանքով նախադպրոցական տարիքի երեխաների մոտ համապատասխան կարողունակությունների ձևավորման կարևորությամբ և անհրաժեշտությամբ:

Աշխատանքի նպատակն է նախադպրոցական կրթական չափորոշիչի ներդրմանն ընդառաջ ներկայացնել նախադպրոցական տարիքի երեխաների մոտ համապատասխան կարողունակությունների ձևավորման կարևորությունը և անհրաժեշտությունը: Այս նպատակի ձեռքբերման համար առանձնացրել ենք հետևյալ խնդիրները.

Ներկայացնել նախադպրոցական կրթության պետական չափորոշիչի հիմնական դրույթները

Ներկայացնել նախադպրոցական տարիքի երեխաներից ակնկալվող կարողունակությունները

# 1.ՆԱԽԱԴՊՐՈՑԱԿԱՆ ԿՐԹՈՒԹՅԱՆ ՊԵՏԱԿԱՆ ՉԱՓՈՐՈՇՉԻ ՀԻՄՆԱԿԱՆ ԴՐՈՒՅԹՆԵՐԸ

Նախադպրոցական կրթության պետական կրթական չափորոշիչը հանրակրթության պետական կրթական չափորոշիչի բաղկացուցիչ մաս կազմող նորմատիվ իրավական ակտ է, որը սահմանում է նախադպրոցական տարիքի երեխաների զարգացման կրթական ծրագրերի բովանդակությունը, նրանց ներկայացվող վերջնարդյունքները, ուսումնական բեռնվածության առավելագույն ծավալը, նախադպրոցական տարիքի երեխաների կրթության և զարգացման վերջնարդյունքների ապահովման հիմքերը:

Չափորոշիչը ներառում է՝

- 1) ուսումնադաստիարակչական հիմնական բնագավառները, կրթական ծրագրի բաղադրիչները և դրանց սահմանման մանկավարժահոգեբանական սկզբունքները.
- 2) երեխաների ուսումնական, խաղային բեռնվածության առավելագույն չափը կամ դրանց հարաբերակցությունը.
- 3) երեխաների զարգացման ընթացքի և առաջադիմության մակարդակի դիտարկման ձևերը.
- 4) նախադպրոցական ուսումնական հաստատություններում ներառական և երեխայակենտրոն միջավայրի չափանիշները, որոնք հաստատում է կրթության պետական կառավարման լիազորված մարմինը.
- 5) նախադպրոցական ուսումնական հաստատություններում երեխայի անվտանգ միջավայրի և աղետներին պատրաստվածության չափանիշները:

Չափորոշիչը հանդիսանում է երեխայակենտրոն կրթության հիմքը. հնարավորություն է ընձեռում արձագանքելու երեխաների կարիքներին և հետաքրքրություններին, հարգելու յուրաքանչյուր երեխայի անձը, խթանելու համատեղ ուսումնառության գործընթացը:

Նախադպրոցական կրթության պետական կրթական չափորոշիչի իրականացումը նախադպրոցական ուսումնական հաստատությունների կողմից պարտադիր է՝ անկախ դրանց կազմակերպաիրավական ձևից և ենթակայությունից:

Ըստ չափորոշի, մշակվում են միջին և բարձրագույն մասնագիտական հաստատությունների նախադպրոցական ֆակուլտետների (բաժինների) ուսումնական ծրագրեր և վերապատրաստումների թեմատիկ պլաններ, ծնողական կրթության ծրագրեր:

Նախադպրոցական տարիքի երեխաների կրթության բովանդակությունը հիմնականում ներառում է զարգացման հետևյալ ոլորտները՝

- 1) շարժողական ոլորտ.
- 2) խոսքի և հաղորդակցական ոլորտ.
- 3) հուզական, սոցիալ-անձնային ոլորտ.
- 4) իմացական ոլորտ.
- 5) ինքնասպասարկման, անվտանգության, առողջ ապրելակերպի ոլորտ:

Կրթության բովանդակության՝ չափորոշով սահմանված հասանելի մակարդակը ապահովվում է կրթության բաղադրիչների միջոցով, որոնք իրականացվում են գիտելիքների, կարողությունների և հմտությունների ձևավորմամբ՝ երեխաների զարգացման ոլորտներին և ուղղություններին համապատասխան կազմված, կրթության պետական կառավարման լիազոր մարմնի կողմից հաստատված Նախադպրոցական կրթական ծրագրի համաձայն:

Նախադպրոցական կրթական ծրագրերի բովանդակությունը ներկայացվում է զարգացման հետևյալ հիմնական բնագավառներով՝

- 1) խոսքի, լեզվամտածողության, տրամաբանության, գրաճանաչության, ընդհանուր ճանաչողական զարգացում.
- 2) հուզականային և սոցիալ-անձնային զարգացում.
- 3) շարժողական և ֆիզիկական զարգացում.
- 4) աշխարհաճանաչման ինքնուրույնության, ստեղծագործական ունակությունների և հնարամտության զարգացում.

5) բարոյական, ազգային, էկոլոգիական, իրավական և սեռային գիտակցության և մտածելակերպի զարգացում՝ արժեքային հիմունքների փոխանցմամբ:

Կրթական ծրագրերը պետք է նպատակաուղղված լինեն՝

1) հետաքրքրասիրության զարգացմանը՝ որպես նախադպրոցականի ճանաչողական (իմացական) ակտիվության գործոնի.

2) երեխայի ընդունակությունների զարգացմանը.


3) ստեղծագործական երևակայության զարգացմանը.

4) հաղորդակցական հմտությունների ձևավորմանը:

## **2. ՆԱԽԱԴՊՐՈՑԱԿԱՆ ՏԱՐԻՔԻ ԵՐԵՄԱՆԵՐԻ ԱԿՆԿԱԼՎՈՂ ԿԱՐՈՂՈՒՆԱԿՈՒԹՅՈՒՆՆԵՐԸ**



Կարողունակությունները նախադպրոցական տարիքի երեխաների կողմից ուսումնառության և դաստիարակության գործընթացում ձեռք բերված գիտելիքների, հմտությունների, արժեքների և դիրքորոշումների հիման վրա ըստ իրավիճակի արդյունավետ ու պատշաճ արձագանքելու ձևեր են:



Նախադպրոցական տարիքի երեխաների կարողունակությունները ձևավորվում են ուսուցման և դաստիարակության կազմակերպման միջոցով:

Նախադպրոցական կրթության կարողունակություններն են՝

1) լեզվական և հաղորդակցական կարողունակություն՝

երեխան տիրապետում է գրական հայերենին, հաղորդակցվում տարբեր իրավիճակներում և միջավայրերում, դրսևորում խոսքային և ոչ խոսքային ակտիվություն՝ մասնակցություն ունենալով հասարակական կյանքին: Ընդունակ է ճանաչել բանավոր ներկայացվող երևույթները, ըմբռնել, նկարագրել, մեկնաբանել դրանք, ներկայացնել բացատրություններ: Երեխան ունակ է կողմնորոշվել լեզվական միավորներում՝ հնչյուն, բառ, նախադասություն, ունի տարրական պատկերացումներ վանկի, հնչյունի և տառի մասին, ինքնուրույն ձևակերպում է սեփական մտքերը՝ ազատ

և կապակցված արտահայտելով կարծիք, վերաբերմունք որևէ երևույթի մասին: Այլ մարդկանց հետ հաղորդակցության մեջ պատկերացնում է տեղեկատվական տեխնոլոգիաների դերը և մեծահասակների օգնությամբ կիրառում դրանք.

#### 2) ճանաչողական և մոտիվացիոն կարողունակություն՝

Երեխան, իր տարիքին համապատասխան, ընդունակ է պատճառահետևանքային կապեր տեսնել երևույթների, իրադարձությունների միջև, ճանաչել առարկաների և օբյեկտների կապերը, հարաբերությունները, նոր խնդիրներ լուծել: Դրսևորում է ակտիվություն, հետաքրքրասիրություն, ճանաչողական հետաքրքրություն աշխարհի, առարկաների և երևույթների, ինչպես նաև հարաբերությունների կառուցման հանդեպ: Երեխան հաճույքով (ակտիվ) ներգրավվում է գործունեության տարբեր ձևերի, մտավոր տարբեր գործողությունների, նոր բացահայտումների մեջ.

#### 3) ինքնաճանաչողական և սոցիալական կարողունակություն՝

Երեխան ճանաչում է իր արտաքին առանձնահատկությունները, ձեռք է բերում սեռադերային պատկերացումներ: Երեխան ունի պատկերացում սեփական հնարավորությունների մասին, վստահություն սեփական ուժերի և կարողությունների հանդեպ: Ընդունակ է ինքնակազմակերպվելու, դրսևորում է ինքնուրույնություն և ինքնասպասարկման հմտություններ: Գործողություններում դրսևորում է նպատակաուղղվածություն և կենտրոնացվածություն: Երեխան ճանաչում է սեփական և այլոց հույզերը, կարողանում է կառավարել սեփական հույզերը: Ճանաչում է մեծահասակների և հասակակիցների փոխհարաբերություններում սահմանված վարքային կանոնները և դրսևորում է սոցիալապես ընդունված նորմերին համապատասխան վարք: Շփման մեջ նախաձեռնող և կառուցողական է, դրսևորում է ընկերակցելու, համագործակցելու հմտություններ.

#### 4) Ժողովրդավարական և քաղաքացիական կարողունակություն՝

Նախադպրոցական տարիքում երեխան տիրապետում է բարեվարքության և սոցիալական արդարության պարզագույն կանոններին. դրսևորում է հարգանք և հոգատարություն շրջապատի հանդեպ, գնահատում է արարքների բարոյական

ուղղվածությունը: Ճանաչում է հայրենիքը, Հայաստանի խորհրդանիշները (դրոշ, զինանշան, օրհներգ), դրսևորում է սեր և նվիրվածություն հայրենի երկրի հանդեպ: Ունի տարրական պատկերացումներ սեփական իրավունքների ու պարտականությունների մասին.

#### 5) թվային և մեդիա կարողունակություն՝

Երեխան ունի տարրական պատկերացումներ մեդիայի վերաբերյալ, կողմնորոշվում է մեդիա բազմազանության մեջ, մեծահասակի աջակցությամբ գնահատում է ներկայացված տեղեկատվությունը, այն համադրում սեփական պատկերացումներին՝ դրսևորելով քննադատական և ընտրողական մոտեցում: Երեխան կարողանում է օգտվել մեդիա տարրական գործիքներից՝ միևնույն ժամանակ հասկանալով դրանց կիրառման հնարավոր վտանգները և այդ հարցում սեփական պատասխանատվությունը: Երեխան դրսևորում է առարկաների, երևույթների մոդելավորման և ստեղծագործական կարողություններ, տարբերում է իրական և վիրտուալ աշխարհները, հասկանում դրանց տարբերությունները.

#### 6) մշակութային կարողունակություն՝

Երեխան կարողանում է գնահատել գեղեցիկը, ճանաչում և վերլուծում է հանրահայտ հայ և արտասահմանյան մանկագիրների գեղարվեստական ստեղծագործությունները, ճանաչում է ազգային և համաշխարհային մշակութային նմուշների ինքնատիպությունը: Դրսևորում է ընդգծված հետաքրքրություն գեղարվեստական գործունեության հանդեպ, ունակ է երաժշտության, կերպարվեստային գործունեության տարբեր տեսակների, ազգային տոների ու ավանդույթների միջոցով արտահայտելու սեփական հույզերը, զգացմունքներն ու տպավորությունները.

#### 7) մաթեմատիկական և տեխնիկական կարողունակություն՝

Երեխան կարողանում է կատարել պարզ մաթեմատիկական գործողություններ, համեմատում, հետազոտում է առարկաները և երևույթները, գտնում է տարբեր խնդիրների լուծումներ, ճանաչում է թվանշանները, տիրապետում է նախաթվային և թվային հասկացություններին. Երեխան կարողանում է որոշել առարկաների քանակը,

համեմատել դրանք ըստ մեծության, չափի, ձևի և գույնի, տարբերակել մասը և ամբողջը, երկրաչափական պատկերներն ըստ հատկանիշների: Կարողանում է առարկաները տարբերակել նաև ըստ նյութի: Ցուցաբերում է հետաքրքրություն սարքավորումների հանդեպ, կարողանում է ծանոթ տեխնիկական հանգույցներից կառուցել նոր համադրություններ:

#### 8) տնտեսական կարողունակություն՝

Երեխան կարողանում է համարժեք ճանաչել և վերլուծել մեծերի աշխատանքը և դրանից ստացված արդյունքները: Գիտի տարբեր մասնագիտությունների անվանումներ և դրանց առանձնահատկությունները: Ցուցաբերում է տնտեսական պարզ հասկացությունների իմացություն, գիտի իր հետ առնչվող առարկաների ձեռքբերման եղանակները, կիրառում է տնտեսական պարզ բառապաշար: Երեխան հասկանում է շրջապատող աշխարհի և բնության երևույթների միասնականությունն ու փոխկապակցվածությունը: Ճանաչում է բնության երևույթները, գիտի բնության առանձին երևույթների վտանգների, դրանցից պաշտպանվելու մասին, անվտանգ վարքագիծ է դրսևորում բնության առանձին երևույթների՝ կայծակի, ամպրոպի, կարկուտի, անձրևի, մառախուղի ժամանակ: Ունի տարրական պատկերացումներ շրջակա միջավայրի և դրա պահպանման վերաբերյալ: Կարողանում է նկարագրել մարդու և տնտեսության ազդեցությունը բնության վրա: Հասկանում է շրջակա միջավայրի պահպանման գործում սեփական դերը, նշանակությունը և մասնակցում է այդ գործընթացում:

#### 9) ֆիզիկական կուլտուրայի կարողունակություն՝

Երեխան պատկերացում ունի ֆիզիկական վարժությունների առողջարարական նշանակության, առողջ սննդի, առողջ ապրելակերպի վարման հիմնական կանոնների՝ օրգանիզմի կոփման, օրվա ռեժիմի, հիգիենիկ կանոնների, ճիշտ կեցվածքի պահպանման մասին: Ընկալում է ֆիզիկական վարժությունների ճիշտ կատարման ձևը, ճանաչում և տարբերում է ամառային և ձմեռային մարզաձևերը: Ընդհանուր պատկերացում ունի շարժողական ընդունակությունների, տարածված մարզաձևերի, մարզագույքի, սպորտային հանդերձանքի մասին, ճանաչում է հայ և այլազգի անվանի

մարզիկներին: Երեխան ընդունակ է ճիշտ կատարելու մարմնամարզական, աթլետիկական վարժություններ, տարաբնույթ շարժողական գործողություններ շարժախաղերում, մարզախաղերում, շարժողական ակտիվության այլ ձևերում: Դրսևորում է անհրաժեշտ ֆիզիկական պատրաստվածություն և պահպանում է առողջ ապրելակերպի վարման կանոնները: Երեխան ինքնուրույն կատարում է նմանողական շարժումներ, ընդհանուր զարգացնող վարժություններ՝ առանձին, զույգերով, մարզագույքով: Վարժությունների կատարման ընթացքում, շարժախաղերում, թիմային խաղերում դրսևորում է ինքնուրույնություն, կարգապահություն, կամք, պատասխանատվություն, համագործակցություն, վճռականություն, փոխօգնություն, ընկերասիրություն, նախաձեռնողականություն:

### **ՀԵՏԱԶՈՏՈՒԹՅԱՆ ԸՆԹԱՑՔԸ**

Հետազոտական աշխատանքը անցկացվել է «Գրիբոյեդովի մանկապարտեզ» ՀՈԱԿ-ի տարատարիք խմբում: Որպես թեմա ընտրվեց «Աշուն» թեման: Պլանավորվեց իրականացնել շրջակա միջավայրի դիտարկում, էկոլոգիայի, բնության հետ

ծանոթացում: Մնացած բոլոր պարապմունքների ընթացքում (խոսքի զարգացում, տարրական մաթեմատիկական պատկերացումներ, երաժշտություն, ծեփ, ապլիկացիա) շարունակվեց առաջադրված թեման: Ստորև ներկայացնեմ պարապմունքների մի քանի օրինակ:

## Պարապմունք 1

Խոսքի զարգացում

Թեմա՝ «Աշուն»

Խնդիրներ՝ Ամրապնդել երեխաների գիտելիքները բնության մեջ տեղի ունեցող սեզոնային փոփոխությունների մասին, ընդհանրացնել և համակարգել նրանց պատկերացումները աշնան բնութագրիչ հատկանիշների մասին, ծանոթացնել նրանց բնության օրացույցին: Դաստիարակել սեր հայրենի բնության հանդեպ, հարստացնել բառապաշարը, տերևաթափ, բերքահավաք, ոսկե, նախշուն, ամպամած, գույնզգույն, վարդագույն, շագանակագույն, դեղնահեր, սեպտեմբեր, հոկտեմբեր, նոյեմբեր բառերով, ամրապնդել ամբողջական նախադասություններով միտքը կապակցված արտահայտելու կարողությունը:

Պարապմունքի ընթացքում կազմակերպվեց զբոսանք մանկապարտեզի մերձակա պուրակում, հողամասում: Զբոսանքի, դիտումների ժամանակ երեխաների ուշադրությունը հրավիրեցինք աշնանային բնապատկերի գեղեցկության, գունային բնորոշ առանձնահատկությունների վրա: Այնուհետև երեխաները ունկնդրեցին աշնանային բնության մեղեդիները՝ քամուց օրորվող ծառերի աղմուկը, թափվող տերևների շրշունը, չվող թռչունների ճիչերը: Երեխաների ուշադրությունը հրավիրեցինք աշնանային գուներանգներին և առաջադրեցինք հարցեր. նայելով որոշել, թե ո՞ր գույներն են իշխում աշնանային բնապատկերում, ի՞նչ են հիշեցնում այդ գույները, ինչպիսի՞ տրամադրություն և զգացում են արթնացնում դրանք: Երեխաների հետ եկանք եզրահանգման, որ աշնանը բնորոշ են դեղին, նարնջագույն, ոսկեգույն, շագանակագույն, կարմիր գույները և դրանց նրբերանգները և այդ գույները հիշեցնում են արև, կրակ, առաջացնում են ջերմություն, ուրախ, աշխույժ տրամադրություն: Այդ գույներին կարելի է տալ տաք անվանումը:

Խաղ՝ «Աշուն»

Նպատակ՝ Ամրապնդել երեխաների գիտելիքները բնության աշնանային գույների վերաբերյալ, սովորեցնել տարբերել տերևներն իրենց չափերով և գույներով: Ծանոթացնել տերևաթափ հասկացությանը:

Անհրաժեշտ պարագաներ՝ աշնանային տերևներ:

Խաղի ընթացքը

Ըստ հրահանգի երեխաներն ընտրում և վերցնում են մեկական տերև, որը նախապես հավաքել էին մանկապարտեզի բակից: Նրանցից յուրաքանչյուրը ցուցադրում և ներկայացնում է իր ընտրած տերևն ըստ չափի և գույնի: Համեմատում է ծառի տակ թափված տերևները ճյուղերին մնացածների հետ, որոշում, թե տվյալ տերևը որ ծառից է ընկել ցած: Բացատրեցինք երեխաներին, որ տերևները շատ թեթև են և ծառից պոկվելու հետևանքով նրանք օդում մեղմ ճոճվելով թաքփվում են գետնին:

Երեխաները թափահարելով ձեռքերը, վերածվելով թափվող տերևների, վազվզում են:

Լսելով դաստիարակի հրահանգը՝ «Տերևաթափ է, տերևաթափ է, դեղին տերևները թռչում և պտտվում են օդում»: Հրահանգից հետո դեղին տերևներ ունեցող երեխաները պտտվում և հանգիստ կքանստում են:

«Տերևաթափ է, տերևաթափ է, կարմիր տերևները թռչում և պտտվում են օդում»: Հրահանգից հետո կարմիր տերևներ ունեցող երեխաները պտտվում և հանգիստ կքանստում են:

«Քամի բարձրացավ» արտահայտությանը զուգահեռ դաստիարակը թևերը պարզած մոտենում է երեխաներին: Երեխաները ոտքի են կանգնում և քամուց փախչելով, պտտվում են տարբեր կողմերում:

Խաղն ավարտվեց Հռիփսիմե Խրիմյանի «Դեղին տերևիկը» երգով:



Այլընտրանքային նկարչության ընթացքում երեխաները գուաշով ներկելով բնական



տերևը, ստացան գեղեցիկ աշնանային ծառեր:



Պարապմունք 2

Թեմա՝ «Մրգեր»

Տեսակը՝ դիդակտիկ խաղ

Նպատակը՝



Ընդլայնել երեխաների գիտելիքները մրգերի, դրանց օգտակարության մասին, զարգացնել ստեղծագործական միտքը, նկարագրական խոսքը, հարստացնել բառապաշարը մրգերի անուններով, գնորդ բառով:

Անհրաժեշտ նյութերը՝

Մրգերի նկարներ, թարմ մրգեր

Ընթացքը՝

Սեղանին դասավորեցինք մրգերի նկարներ: Դաստիարակը հանդես եկավ որպես շուկայի վաճառող: Երեխաները հերթով մոտենում են դաստիարակին՝ «շուկայի վաճառողին» և նկարագրում այն միրգը, որը ցանկանում են գնել, օրինակ՝ դեղին, հյութալի, կորիզով, երկու կես է լինում, մայրիկները համով մուրաբա և չիր են պատրաստում այդ մրգից: Մյուսները գուշակում են. եթե ճիշտ են գուշակում, «գնորդը» վերցնում է այդ մրգի նկարը և նստում իր տեղը: Եվ այսպես մինչև բոլոր երեխաները մասնակից լինեն:

2-րդ փուլում դաստիարակը առաջարկում է հանելուկներ:

Ի՞նչն է ալվան

Կարմրաթուշ,

Կորիզն անհամ

Ինքն անուշ:

(դեղձ)

Միրգ է կլոր ու դեղին,

Մեր բոլորի սիրելին,

Պահարանում թե պահես,

Շատ անուշ բույր կտա քեզ:

(սերկևի)

Ասես լինի փոքրիկ սնդուկ,

Մեջը՝ կրակ, քաղցրիկ հուլունք:

(նուռ)

Պարապմունք ավարտում ենք շուտասելուկով.

Ձորում ծաղկած խնձորենին

Խնձոր տվեց հնձվորին:

Վերջում համտեսում ենք մրգերը:



Պարապմունք 3

Թեմա - «Թռչուններ»

Նպատակ – Թեմայի ուսումնասիրության ընթացքում ստեղծել պայմաններ ճանաչողական, իմացական և ստեղծագործական կարողությունների զարգացման համար:

Խնդիրներ

- Ձևավորել տարրական պատկերացումներ թռչունների մասին
- Ծանոթանալ դրանց կառուցվածքին, տեղաշարժման ձևերին
- Դաստիարակել հոգատար վերաբերմունք փռչունների նկատմամբ

#### Մասնակիցներ

- Տարատարիք խմբի երեխաներ
- Խմբի դաստիարակ
- Երաժշտական դաստիարակ

Պարապմունքի սկզբում դաստիարակը պարզեց, թե ինչ թռչուններ գիտեն երեխաները: Այնուհետև առաջարկեց գուշակել հանելուկներ թռչունների մասին և գուշակելու դեպքում ցույց տալ համապատասխան թռչունի նկարը: Նկարներին նայելով՝ երեխաները նկարագրեցին թռչուններին և որոշեցին՝ ճիշտ է արդյոք նկարագրված թռչունը: Ի դեպ, երեխաները տնօրենին իրենց պարապմունքը դիտելու էին հրավիրել նամակատար աղավնու միջոցով:

Երկու սիրուն աչիկ ունի,

Մկրատաձև պոչիկ ունի,

Կուրծքը սպիտակ կաթի նման,

Թևերը սև սաթի նման: (ծիծեռնակ)

Թռչում է, հավ չի,

Լողում է, նավ չի,

Երգում է այն ժամին,

Երբ մոտ է իր մահին: (կարապ)

Կա մի թռչուն բարձրաթռիչք,

Կորակտուց և գիշատիչ,

Եվ ուժեղ է, և սրատես,

Մագիլները՝ թրերի պես: (արծիվ)

Ամեն տարի վաղ գարունքին

Նա իր բույնն է դառնում կրկին,

Որսում օձ, գորտ ու մկներ,

Բարեկամն է վաղուց նա մեր: (արագիլ)

Ո՞ր թռչունն է մեզ հին ընկեր,

Նամակատար, Նամակաբեր,

Նա նշանն է խաղաղության,

Բարեկամն է ողջ մարդկության: (աղավնի)





Երեխաները կատարեցին նաև կառուցողական աշխատանք՝ որպես նյութ օգտագործելով փետուրներ:





Ընթացքում երեխաներն ունկնդրեցին երգ-խաղիկ «Թռչունները և քամին»:



Որպես վերջնարդյունք

Երեխաները ճանաչեցին և անվանեցին մի շարք թռչուններ

Ունեցան տարրական պատկերացումներ թռչունների արտաքին տեսքի և առանձնահատկությունների մասին՝

\* մարմնի ձև

\* տեղաշարժվելու տարբերակներ

\* արձակած ձայներ

\* որտեղ և ինչպես են ծմեռում

Թեման ամփոփվեց «Աշունը մեզ հյուր» խորագրով ցերեկույթով, որին ներկա էին երեխաների ծնողները և մանկապարտեզի աշխատակազմը:

Նկարագրությունը.

Նպատակ՝ Երեխաների մեջ զարգացնել շրջապատն ընկալելու ունակությունը, նրանց ուշադրությունը հրավիրել բնության աշնանային փոփոխություններին, բառապաշարում ամրակայել բանջարանոց, այգի, բերքահավաք բառերը:

Գործող անձինք՝ Տարատարիք խմբի սաներ:

Անհրաժեշտ նյութեր և պարագաներ՝

Մրգով և բանջարեղենով լի զանբյուղներ, ավտոմեքենա, վարորդի գլխարկ, նապաստակի և ոգնու զգեստներ, անձրևանոց խաղի համար:

Ընթացքը

Հանգիստ երաժշտության ներքո երեխաները մտնում են դահլիճ:

1. Այս ի՞նչ ձայներ են:
2. Սա աշնանային բնության ձայներն են:
3. Ինչ գեղեցիկ է բնությունը, ոսկե դեղին տերևներով, հասունացած մրգերով և բանջարեղեններով:
4. Իսկ այս ի՞նչ բեռնատար է, տեսնես ու՞ր է գնում:
5. Պապիկ, պապիկ, Այս ու՞ր եք գնում:
6. Գնում ենք աշնանային այգի միրգ բանջարեղեն հավաքելու:
7. Մենք էլ կարո՞ղ ենք միանալ ձեզ:
8. Իհարկե կարող եք, նստեք:

Երաժշտություն

Պապիկ – Երեխաներ դուք գիտե՞ք, որ մարդկանց ողջ կյանքը խիստ ձևով կապված է բնության հետ:

– Այո, մարդիկ ամեն վայրկեան օդ են շնչում, ծարավելիս ջուր են խմում, սնվում են բնության բարիքներով:

- Ինչ մաքուր է օդը այգում: Այստեղ ծառերն են, որ մաքրում են օդը՝ կլանելով նրա մեջ եղած փոշին և թունավոր գազերը:

- Այո, մեր երկիր մոլորակն ամբողջությամբ պատված է թափանցիկ մուշտակով: Իսկ գիտե՞ք ինչ կլինի, եթե հանկարծ այդ մուշտակը անհետանա:

- Այո, երկրագնդի վրա ամբողջ ջուրն ու մյուս հեղուկները կսկսեն եռալ: Արեգակի ճառագայթները կխանձեն ողջ կենդանի բնությունը և ամեն ինչ կամայանա:

Երեխա – Երեխաներ մենք պետք է պահպանենք այս ամենը, որպեսզի ունենանք մաքուր շրջակա միջավայր և ապրենք առողջ:

Ամպրոպի ձայն

Տեղս նեղ է, օգնեցեք,

Հողի տակից հանեցեք:

Թե որ քիչ էլ մնամ ես,

Կչորանամ ախ այսպես:

Վաաաայ, վաաաաայ, վաաաայ.....

Երգ – Անձրև

- Վայ, ինչ գեղեցիկ սունկ է: Ծառը մեծ, սունկը փեքր:

Պար



Աշունն անտես  
Մտավ մեր բակ,  
Գույն – գույն ներկեց  
Այգի, պուրակ:  
Հանդում վառեց  
Դեղին խարույկ,  
Ուրախացան ծեր ու մանուկ:

Երեխա – Երեխաներ, աշունն իր շռայլ վրձնով ներկել է ծառերի տերևները:

Տերև - Մրսում եմ, մրսում  
Ծառի վրայից,  
Տերևն է ասում:  
Քամի ջան, քամի  
Շուտ եկ ինձ օգնիր  
Որ ծառից իջնեմ  
Սպիտակ ու փափուկ  
Վերմակով ծածկվեմ:

Տերևները քամու հետ  
Պար են բռնել առաջ ետ,  
Խշխշում են ու երգում,  
Նոր զարդարված պուրակում:

Գալդ բարի այ աշուն,  
Ինչ սիրուն ես, ինչ նախշուն:

Այ փոքրիկներ, այ սիրուններ,  
Ասաց քամին տերևներին,  
Աշուն եկավ, մոտ է ձմեռ,  
Ի՞նչ եք դողում ծառի ծերին:  
Ոսկի, դեղին, վառ ծիրանի,  
Գույներ հագեք խայտաբղետ,  
Ու ճյուղերից ձեր մայրենի,  
Եկեք ինձ հետ,  
Փախեք ինձ հետ:

Տերևները հենց լսեցին  
Նախշուն - նախշուն գույներ հագան,  
Սվսվալով տխուր երգեր  
Քամու թևին թռան փախան:

Պար - տերևներ

Դաշտ ու այգի դեղին հագան,  
Ծառ ու ծաղիկ մերկացան,  
Թռչունները երամ - երամ

Մեր աշխարհից հեռացան:

Երգ – Ջան աշուն

Աշունը մեզ հյուր է եկել

Տեսեք ինչքան բերք է տվել

Զարդարել է մեզ նոր շորով

Ադամանդե ցող ու շողով:

Լացի ձայն

– Այս ի՞նչ ձայն է տեսնես, ո՞վ է լաց լինում: Ինչու՞ ես լալիս, այ փշոտ ոզնի: Քեզ ո՞վ է նեղացրել:

Ոզնի – ԻՆձ ձեռք մի տուր, այ փոքրիկ: Կծակեմ մատիկդ նուրբ: Մոլորվել եմ այստեղ ես, Չեմ գտնում իմ տունը ես:

– Մենք քեզ կօգնենք, այ ոզնի: Մի վախեցիր դու այդպես: Արի մեր բարիքների քեզ բաժին կհանենք:

Նապաստակը դուրս է գալիս մրգերի զամբյուղից.

– Այ դու շլիկ նապաստակ, ինչպե՞ս հայտնվեցիր այստեղ:

Նապաստակ – Զամբյուղի մեջ ես բանջարեղեն տեսա և սկսեցի ուտել:

Երեխա – Սխալվում ես նապաստակ, դու հայտնվել ես մրգի զամբյուղում:

Ահա քեզ 2 գազար, Դե շուտ փախիր դու անտառ:

Երգ – Աշուն

Պապիկ – Ի՞նչ նվիրեց մեզ աշունը, երեխաներ:

Ուրախություն, գույներ, բերք, բարիք, տերևաթափ, բանջարեղեն, միրգ, թռչունների չու.....

Երգ Աշուն

Պապիկ – Ես էլ ցանկանում եմ, որ բոլոր աշունները խաղաղ լինեն:



Յերեկոյթի ավարտին տնօրենը շնորհակալություն հայտնեց դաստիարակին և երեխաներին կատարված աշխատանքի համար և շեշտեց, որ երեխաները աշունը ներկայացրեցին ընկալելի և պատկերավոր: Դաստիարակը հասել էր իր

առջև դրված խնդիրներին երեխաների համար մատչելի և հետաքրքիր տարբերակով:

Թեմատիկ պարապմունքը նպաստեց զարգացնել գեղեցկությունը գնահատելու, ստեղծագործաբար մտածելու երեխաների կարողությունները, ձևավորեց սեփական մտքերը արտահայտելու կարողությունները, ընդլայնեց երեխաների գիտելիքները աշնան մասին, ստեղծագործական միտքը, երկխոսություն կառուցելու երեխաների կարողությունը: Արդյունքում երեխաների մոտ ձևավորվեցին լեզվական և հաղորդակցական, ճանաչողական և մոտիվացիոն, մաթեմատիկական և տեխնիկական, տնտեսական կարողունակություններ:

## ԵԶՐԱԿԱՑՈՒԹՅՈՒՆ

Այսպիսով, նախադպրոցական կրթության պետական կրթական չափորոշիչը սահմանում է հստակ վերջնարդյունքներ, որոնք ուղղված են կարողունակությունների ձևավորմանը: Սա պետք է լինի այն հիմքը, որի շուրջ նախադպրոցական ուսումնական հաստատությունների մանկավարժները պետք է պլանավորեն և կազմակերպեն ուսումնադաստիարակչական աշխատանքը՝ նպատակ ունենալով նախադպրոցական կրթության ավարտին ունենալ ձևավորված կարողունակ անձ և ապահովել սահուն անցումը դպրոցին:

**ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ**

«Նախադպրոցական կրթության մասին» ՀՀ օրենք.

«Նախադպրոցական մանկավարժություն» - Երևան 2008 թ. /Ս. Մարության, Ա. Դալլաքյան/

Նախադպրոցական կրթության հիմնական ծրագիր միջին խումբ - Երևան 2021թ.

<< Կրթության զարգացման և նորարարությունների ազգային կենտրոն>> հիմնադրամ

Նախադպրոցական կրթության հիմնական ծրագիր ավագ խումբ - Երևան 2021թ.

<< Կրթության զարգացման և նորարարությունների ազգային կենտրոն>> հիմնադրամ

ՀՀ կառավարության որոշումը նախադպրոցական կրթության պետական կրթական չափորոշիչը հաստատելու մասին,  
<https://lib.armedu.am/files/resource/files/2022-02-24/9368835223ec84664689175ec655a9e8.pdf>, ընդ. 13.05.2021

Տոնական Ղողանջներ – Երևան 2011, Լալա Սմբատյան

Խոսքի զարգացման պարապմունքները մանկապարտեզի միջին խմբում – Երևան 2012, Հ. Միտոյան, Լ. Սմբատյան, Լ. Սարգսյան